



12 de setembro 2012. ADEGA-Proxecto Ríos ven de participar no [4º Congreso Estatal de Especies Exóticas Invasoras](#)

. O congreso celebrouse en Pontevedra os pasados días 10 e 11 de setembro, dando paso a partir de hoxe ao

[Neobiota 2012](#)

(sétima conferencia europea en invasións biolóxicas). Foron numerosas as charlas que se sucederon durante estes dous días centradas nas invasións tanto de fauna como de flora na península ibérica e en países americanos. Destacouse a importancia das labores de seguimento de calquera acción de eliminación de invasoras, e a necesidade de previsión de medios para tal fin neste tipo de actuacións.

Diferentes proxectos ao longo da península (e do planeta) loitan contra esta ameaza que despraza e extingue especies, sendo a segunda causa da perda de biodiversidade. Son moitos os esforzos que dende algunhas administracións, universidades e organizacións como ADEGA-Proxecto Ríos se realizan día a día, e son moitos os fondos públicos empregados neste tipo de accións. Porén, Proxecto Ríos lamenta que alén do póster presentado non houbo ningunha comunicación centrada na importancia da divulgación á cidadanía, nin do voluntariado ambiental, deixando de lado unha vez máis a importancia da educación ambiental como ferramenta ante as especies invasoras.

Dende ADEGA-Proxecto Ríos desenvólvense dende o 2007 proxectos de divulgación, educación e voluntariado ambiental centrados nesta problemática, nos que levan participado varios centos de persoas en todo o país. A participación cidadá neste tipo de actuacións consegue informar e concienciar sobre as especies invasoras. Aínda así é necesario un maior esforzo, as iniciativas de educación e voluntariado son fundamentais para informar do problema así como para capacitar a persoas no seu manexo e xestión.

As especies invasoras supoñen ao ano un gasto de millóns de euros que poderían aforrarse

con programas efectivos de divulgación, alerta e eliminación de pequenas invasións antes de que se convertan nun problema maior.

Por outra banda é necesario que o Catálogo de Especies invasoras sexa unha realidade e que estea baseado en criterios científicos e non en intereses económicos, como está hoxe en día. Deste catálogo téñense eliminado numerosas especies moi prexudiciais para os ecosistemas por intereses económicos (exemplo: eliminación de especies piscícolas por intereses das compañías de acuicultura ou pescadores). Alén diso a falta de comunicación entre as diferentes administracións do estado fai difícil moitas veces unha actuación rápida e efectiva ante este problema.

ADEGA denuncia a falta de implicación e preocupación por parte da nosa administración galega en programas tanto de divulgación, alerta, seguimento como de eliminación de especies invasoras, e alerta da necesidade de seguir informando e divulgando este problema tanto en congresos como en calquera outro ámbito. Sen un coñecemento real da cidadanía non se lograrán avances na loita contra as EEI.